



Datë: 22.01.2026

Numër Protokolli: 351/2026

A.nr.36/2026

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, më Kaltrina Avdullahi-Prenaj, në cilësinë e procesmbajtëses, në procedurë sipas ankesës me numër A.nr.36/2026, të datës 13.01.2026, të parashtruar nga ankuesja E.P, kundër organit të punësimit: Komuna e Vushtrrisë, në çështjen juridike “*Kontestim konkursi*”, duke vepruar në pajtim me nenin 6, paragrafin 1, nën paragrafin 1.1, dhe nenin 18, paragrafin 1, nën paragrafin 1.7 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, më datë 22.01.2026, mori këtë:

V E N D I M

Hedhet poshtë si e parakohshme ankesa me numër A.nr.36/2026, e datës 13.01.2026, e parashtruar nga ankuesja, E.P.

A r s y e t i m

Kandidatja për pranim në shërbim civil, E.P (në tekstin e mëtejme referuar: Ankuesja), më datë 13.01.2026, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër Vendimit me numër protokolli Nr.0515, të datës 06.01.2026, të Njesisë për Menaxhimin e Burimeve Njerëzore, lidhur më refuzimin e aplikacionit në procedurën me numër reference RN00018969, pozita e punës *Zyrtar për Invalid të luftës dhe familjeve të dëshmorëve*, të shpallur nga Komuna e Vushtrrisë.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) duke ju referuar shkresave të lëndës të parashtruar nga palët në procedurë ka gjetur se ankesa e parashtruar nga ankuesja është e parakohshme, **sepse**:

Nga analizimi i provave të lëndës rezulton se Komuna e Vushtrrisë, më datë 07.11.2025, ka shpallur konkursin publik me numër reference RN00018969, për Grupin e administrimit të përgjithshëm, gjegjësisht për pozitën e punës *Zyrtar për invalid të luftës dhe familjeve të dëshmorëve*, më klasë të pozitës Profesional 2, një (1) vend i lirë pune, i hapur për aplikim nga data 08.11.2025 deri më datën 07.12.2025.

Tutje, sipas shkresave të lëndës në konkursin përkatës ka aplikuar edhe ankuesja, e cila sipas Vendimit me numër protokolli Nr.0515, të datës 06.01.2026, të Njesisë për Menaxhimin e Burimeve Njerëzore të Komunës së Vushtrrisë, është njoftuar se nuk është përfshirë në listën e ngushtë, pasi që e njëjta nuk posedon përvojën e punës së dëshmuar *“së paku një (1) vit përvojë pune pas diplomimit”*.

Ankuesja ka parashtruar ankesë në Këshillin e Pavarur Mbikëqyrës për Shërbimin Civil të Kosovës, duke e kundërshtuar vendimin për refuzimin e aplikacionit për pozitën përkatëse, për shkak të shkeljeve të dispozitave të procedurës së përgjithshme administrative, vërtetimit të gabuar të gjendjes faktike si dhe zbatimit të gabuar të së drejtës materiale, mbi pretendimin ankimor se posedon përvojën dhe kualifikimin e kërkuar sipas konkursit. Tutje shton se ky vlerësim i pa saktë, paraqet një trajtim të pa barabartë, diskriminim si dhe cenon sigurinë juridike të garantuar me Kushtetutë. Kërkon nga Këshilli që të aprovoj ankesën si të bazuar dhe të përfshihet në listën e kandidatëve të cilët plotësojnë kushtet e aplikimit.

Kolegji i Këshillit lidhur me pranueshmerinë e ankesës ju referua dispozitave të Ligjit Nr.08/L-197 për Zyrtarët Publikë, gjegjësisht nenit 39, paragrafi 12, ku përcaktohet se: *12. Kandidatët/ët e pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK sipas afatit të përcaktuar në ligjin përkatës për procedurën administrative*, si dhe nenin 17 të Rregullores Nr. 15/2023 për Procedurën e Pranimin në Shërbimin Civil, ku përcaktohet se: *17. Kandidatët e pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK në afat prej tridhjetë (30) ditëve*. Andaj, referuar këtij përcaktimi ligjor si dhe duke u bazuar në provat e administruara të lëndës, Kolegji i Këshillit konstatoi se ankesa e parashtruar nga ankuesja më datë 13.01.2026, është e parakohshme, ngase, kandidati për pranim në shërbim civil ka të drejtë të parashtoj ankesë vetëm pas përfundimit të procedurës së rekrutimit, ndërsa, në rastin konkret ankuesja ka parashtruar ankesë ndaj njoftimit për refuzim të aplikacionit, si veprim procedural në fazën e verifikimit paraprak, kështu që, duke qenë se ankesa është parashtruar ende pa u shpallur njoftimi për rezultatin përfundimtar për procedurën përkatëse të rekrutimit, atëherë, në kuptim të dispozitave të nenit 39 paragrafi 12 të Ligjit Nr.08/L-197 për Zyrtarët Publikë, ankesa A.nr.658/2025 është e parakohshme.

Lidhur me të drejtën në mjete juridike, Kolegji i Këshillit thekson faktin së hedhja poshtë e ankesës si parakohshme, nuk mohon të drejtën e ankueses, që të kundërshtoj njoftimin e rezultateve përfundimtare si akt mbi përfundimin e konkursit lidhur me pozitën përkatëse.

Theksuar si me lart, e duke u bazuar në nenin 18, paragrafin 1, nën paragrafin 1.7 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, u vendos si në dispozitiv të këtij vendimi.

Këshillë juridike: Ky vendim hyn në fuqi në ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

A.nr.36/2026

Kaltrina Avdullahi-Prenaj

Procesmbajtëse

Ardita Haxhnikaj-DEMI

Kryetare e Kolegjit

Vendimi i dërgohet:

- Ankueses, E.P;
- Njësisë së Personelit në Komunën e Vushtrrisë; dhe
- Arkivit të KPMSHCK-së